

Austrheim kommune
Sætremarka 2
5943 Austrheim

Tilleggsfråsegn til kommuneplanen sin arealdel – 2. gongs høyring: Ta vare på Øksnesmarka og Åråsvågen

Med frist 15.02.18 har Austrheim kommune lagt ut arealdelen i kommuneplanen til 2. gongs høyring. Rådmannen sitt framlegg er å leggja ut 700 da av Øksnesmarka til nærings- og industriområde. Dette er endring frå 1. gongs høyring. Då var framlegget frå rådmannen LNF med omsynssone.

Konsekvensutgreiinga til 2. gongs høyring tilrår framleis LNF. Grunngevinga frå Multiconsult er at Øksnesmarka har store verdiar for naturmangfald, trua artar, viktige naturområde og friluftsområde. Konsekvensutgreiinga konkluderer med at dette er ikkje-fornybare ressursar som ikkje kan erstattast. Likevel har rådmannen i høyringsframlegget endra frå LNF til næring.

Naturvernforbundet Nordhordland meiner det ikkje er fagleg grunnlag for å endra arealkategorien frå LNF til næring slik rådmannen har gjort. Vi spør oss om endringa har bakgrunn i det knappe politiske fleirtalet i Austrheim, som i kommunestyret 22.02.17 vedtok å gå inn for næring og industri i Øksnesmarka. Viss så er tilfelle, meiner vi framlegget frå rådmannen ikkje er i samsvar med den fagleg uavhengige rolla rådmannen skal ha i slike saker. Vi meiner nærings- og industriområdet skulle vore rådd frå.

Naturvernforbundet Nordhordland meiner at konsekvensutgreiinga som er gjort, på alle måtar syner at marka er ueigna for næring og industri og at konfliktnivået er svært høgt. Frå Naturvernforbundet sin ståstad gjeld det særleg for biologisk mangfald og friluftsliv og folkehelse, men konfliktnivået er også høgt for landskap, klima, kulturminne og ulike nærings- og samfunnsinteresser. Vi vil mellom anna peika på at det i arealplanen er lagt ut område til hotell i Åråsvågen, og at både Kystlandsbyen og Kystbarnehagen inst i vågen er bygd opp med tanke på attraktivt kystlandskap og sjøretta friluftsliv. Nærings- og industriområdet med store inngrep i strandsona berre 1 km lenger ute i vågen vil etter vårt syn undergrava desse satsingsområda.

Når det gjeld biologisk mangfald, meiner vi funnet av den sterkt trua breibandpraktviklaren saman med samla belastning på raudlista artar og naturtypar som kystlynghei og kystmyr aleine må setja ein stoppar for næringsområdet. Vi meiner dette er i samsvar både med Naturmangfaldlova og forvaltningspraksis i slike saker, jfr. praksis i Hordaland fylkeskommune i kraftsaker.

Når det gjeld kunnskapsgrunnlaget, vil vi be om tilleggsutgreiing med kartlegging av biologisk mangfald i Åråsvågen og naudsynte tilleggsundersøkingar av terrestrisk og akvatisk miljø i Øksnesmarka. Vi vil også be om at det vert gjennomført risiko- og sårbarheitsanalyse for skipstrafikk til og frå det planlagde næringsområdet og at det i høve til m.a. uttak av myr vert sett opp klimarekneskap for omdisponering til næringsområde slik det er planar om.

Det vert elles vist til utfyllande kommentarar i eigen fråsegn til heile kommuneplanen.

Jan Nordø
leiar
Naturvernforbundet Nordhordland

Kopi: Fylkesmannen i Hordaland